

Qitornavissartaarneq pillugu inatsisip allanngortinneqarnera pillugu inatsisip Kalaallit Nunaannut atuutilersinneqarnera pillugu peqqussutip kiisalu meeqqat illersorneqarnerat pillugu aamma nunani tamani qitornavissartaarnerit eqqarsaatigalugit suleqatigiinneq pillugu Haagimi nunat tamalaat isumaqatigiissutaata 29. maj 1993-imeersup atuutilersinneqarnerata Kalaallit Nunaanni Namminersorlutik Oqartussanit akuerineqarnissaanik aalajangiiffigisassatut siunnersuut.

pillugu

Inatsisartut Inatsisit Atortinneqarnerannut Ataatsimiititaliaata

ISUMALIUTISSIISSUTAA

Siunnersuutip aappassaaneerineqarneranut saqqummiunneqartoq

Inatsisartut Inatsisit Atortinneqarnerannut Ataatsimiititaliaat suliarinninnermini makkuninnga inuttaqarpoq:

Inatsisartunut ilaasortaq Harald Bianco, Inuit Ataqtigiit, siulittaasoq
 Inatsisartunut ilaasortaq Isak Hammond, Inuit Ataqtigiit, siulittaasup tullia
 Inatsisartunut ilaasortaq Aleqa Hammond, Siumut
 Inatsisartunut ilaasortaq Justus Hansen, Demokraatit

UKA 09-mi Inatsisartut siullermeerinerisa kingorna inatsisissatut siunnersuut matumani pineqartoq Inatsisit Atortinneqarnerannut Ataatsimiititaliap misissorpaa.

Ilassutitut atortussat paasissutissallu:

Inatsisit Atortinneqarnerannut Ataatsimiititaliap ilassutitut atortussat imaattut Naalakkersuisunit pissarsiarai:

- Meeravissartaarneq pillugu inatsisip allanngortinneqarnissaa pillugu inatsisip aamma inatsisit assigiinngitsut allat Kalaallit Nunaannut atuutilersinneqarnissaannut peqqussutissamut missiliuutip eqikkarneqarnera. (*Isumaliutissiisummi ilanngussaq 1-tut ilanngunneqarpoq*)
- Meeravissartaarneq pillugu inatsisip allanngortinneqarnissaa pillugu inatsisip aamma inatsisit assigiinngitsut allat Kalaallit Nunaannut atuutilersinneqarnissaannut peqqussutissamut missiliuut. (*Isumaliutissiisummi ilanngussaq 2-tut ilanngunneqarpoq*)
- Meeqqat illersorneqarnissaat pillugu aamma nunat assigiinngitsut akornanni qitornavissartaarnermut suleqatigiinneq pillugu Haagimi isumaqatigiissutip 9. maj 1993-imeersup eqikkarneqarnera. (*Isumaliutissiisummi ilanngussaq 3-tut ilanngunneqarpoq*)

Haagimi isumaqatigiissutip oqaasertai tamarmik isumaliutissiisummi ilanngussaq 4-tut ilanngunneqarput.

Meeqqat illersorneqarnissaat pillugu aamma nunat assigiinngitsut akornanni qitornavissartaarnermut suleqatigiinneq pillugu Haagimi isumaqatigiissut 9. maj 1993-imeersoq

Nunani tamalaani qitornarsiartaarnermi tunngaviusumik periaasissat arlallit Haagimi isumaqatigiissumi 1993-imeersumi aalajangersarneqarput. Nunani tamalaani qitornarsiartaarnerit pillugit suliani naalagaaffiit isumaqatigiissuteqartut akornanni suleqatigiinneq pillugu maleruagassanik aalajangersaanissaq isumaqatigiisummi pingaarnertut anguniagaavoq, taamaalillunilu:

- Inatsisit inuiannut tamanut atuuttut (tassungalu ilanngullugit inuttut pisinnaatitaaffiit pillugit nunat tamalaat akornanni isumaqatigiissutip) naapertorlugit nunani tamalaani qitornarsiartaarnerit meeqqap soqutigisai aamma meeqqap tunngaviusumik piginnataaffii ataqqillugit ingerlanneqartarnissaannik qulakkeerisoqassalluni.
- Meeqqanik aallarussisarneq meqqanillu niuerutiginnittarneq pinngitsoortinneqassallutik.
- Qitornarsiartaarnerit naalagaaffimmi isumaqatigiissuteqartumi allami isumaqatigiissut naapertorlugu ingerlanneqarsimasut naalagaaffinnit isumaqatigiissuteqartunit akuersaarneqarnissaat qulakkeerneqassalluni.

Isumaqatigiissut Danmarkimut 1. november 1997-imi atuutilerpoq, taamaattorli Danmarkip naalagaaffiata ilaanut Kalaallit Nunaannut tunngatillugu allanngortitseratarsinnaaneq atuulluni.

Nunatsinni qitornarsiartaarnermi tamani ilaqutariit qitornarsiartaarnerat qitornassanillu qitornarsiartaarnerit manna tikillugu amerlanerpaapput. Taamaattorli kinaassusersinagit nunat tamalaat akornanni qitornarsiartaarnerit pisarput, taakkuli ikitsuinnaapput¹. Tamatuma Kalaallit Nunaata isumaqatigiisummi ilaanissaa pisariaqalersippaa.

Kalaallit Nunaanni qitornarsiartaarnermik inatsimmut sanilliullugu isumaqatigiissutip imarisai piunasaqaatitaalu inatsisit atortinneqarnerannut ministeriap “*Meeravissartaarneq pillugu inatsisip allanngortinneqarnissaa pillugu inatsisip aamma inatsisit assigiinngitsut allat Kalaallit Nunaannut atuutilersinneqarnissaannut peqqussutissamut missiliummut eqikkagaa-ni*” immikoortoq 2.1-imi erseqqinnerusumik allaaserineqarput.

Meeravissartaarneq pillugu inatsisip allanngortinneqarnera pillugu inatsisip Kalaallit Nunaannut atuutilersinneqarnissaanut peqqussut

¹ Manna tikillugu ukiumut marluk-tallimat.

Kalaallit Nunaanni qitornarsiartaartarnermik inatsit 1976-imili allanngortinneqanngilaq. Taamaalilluni aalajangersakkat naalagaaffeqatit sinnerinut (Savalimmiut ilanngullugit) atuuttut arlallit Kalaallit Nunaannut atuutilersinneqarsimangillat.

Qitiusumik isumaqatigiissutitut nunani tamalaani qitornarsiartaartarnermik maleruagassiisutitut Kalaallit Nunaata ilanngussinnaanermut periarfissai eqqarsaatigalugit tamanna manna tikillugu ajornartorsior-titsisarpoq, tassami inatsimmi atuuttumi piumasagaatit qitornarsiartaartarnerit pillugit isumaqatigiissutit pineqartuni aalajangersarneqartut inatsimmi Kalaallit Nunaannut atuuttumi eqquutsinneqanngimmata.

Taamaakkaluortoq isumaqatigiissummi pisussaaffiit nunatsinnit malinneqartussat eqqarsaatigalugit inatsitigut ullutsinnut naleqqussagaanngitsumik taama inissisimaneq ajornartorsior-titsisinnaavoq. Matumani pingaartumik eqqarsaatigineqarpoq FN-ip meeqqanut tunngatillugu isumaqatigiissutaani artikel 12, tassani aalajangersarneqarluni meeqqap nammineerluni isummaminik saqqummiussisinnaasalereersup isummaminik taamaattunik pissutsini meeqqamut namminer-mut tunngassutilinni tamani akornuserneqarani oqaatiginnissinnaatitaassasoq aammalu meeqqap isummamigut saqqummiussai qassinik ukioqarnera aammalu inerissimasusia naapertorlugit pingaartinneqartassasut.

Meeraq aqqaneq marlunnik ukioqalersimappat qitornarsiartaarineqarnissamut (kiisalu qitornarsiaajunnaarnissamut) meeqqap akuersissuteqarsimanissaa qitornarsiartaartarnermik inatsimmi atuuttumi piumasagaataavoq. Akerlianik meeqqat aqqaneq marluk inorlugit ukiullit inerissimassusiata tamanna periarfissaqartippagu tusarniarneqarnissaat qitornarsiartaartarnermik inatsimmi atuuttumi qulakkeerneqanngilaq.

Peqqussutissatut siunnersuummi § 8, imm. 3-mi tamanna iluarsineqarpoq, tamannalu kingusissuk-kut pigaluartoq Inatsisit Atortinneqarnerannut Ataatsimiititaliamit nuannaarutigineqarpoq.²

Tamatuma peqatigisaanik peqqussutissatut siunnersuut Haagimik isumaqatigiissummut naapertuuppoq, tamatumalu Kalaallit Nunaata tassunga ilanngunnissaanut periarfissillugu.

Taamaalilluni peqqussutissamut missingiutip imarai (meeqqap qitornarsiartaarinineqartup akulerutsinneqarnissaa pillugu aalajangersakkap taaneqareersup saniatigut) aalajangersakkat, nunani tamalaani qitornarsiartaartarnermi sulianut maleruagassiisut, suleqatigiiffiit isumaqatigiissut naapertorlugi sulianik isumagittuusut akuerineqarnissaat pillugu aalajangersagaq kiisalu akiliineq allatulluunniit nalilimmik illuatungiliinikkut qitornarsiartaarnissamut inerteqqut.

Taamaakkaluortoq inatsitigut inissisimanerup maanna atuuttup allannguutaanik arlalinnik Haagimik isumaqatigiissutikkut peqqussutigineqanngitsunik peqqutissatut missingiut imaqarpoq. Pingaartumik erseqqissaatigineqarsinnaapput:

² FN-ip meeqqanut tunngatillugu isumaqatigiissutaa 11. maj 1993-imi Kalaallit Nunaannut atuutilerpoq.

- Qitornarsiartaartarneq pillugu Kalaallit Nunaanni siunnersuisoqatigiinnik qitornarsiartaarnermi suliani Naalagaaffiup Sinniisuata aalajangiinissamini atugassaanik oqaaseqaateqartussanik pilersitsineq. Siunnersuisoqatigiit ilaasortarissavai isumaginninnermik ilinniarsimasoq ataaseq, inatsisileritooq kiisalu nakorsaq. Taamaalilluni inatsisilerinnermut tunngasut kisiisa pinnagit allanik immikkut ilisimasalinnik peqataaffigineqartumik aalajangiisoqarnissaa qulakkeerneqassaaq.
- Danmarkimi qitornarsiartaartarneq pillugu ataatsimiititaq qitornarsiartaarniartunik akuerrinnittarnermut atatillugu Naalagaaffiup Sinniisuata aalajangiinaanut naammagittaalliuuteqartarfittut atuutissaaq. Aammattaaq qitornarsiartaartarneq pillugu ataatsimiititaq Naalagaaffiup Sinniisuata aammalu qitornarsiartaartarneq pillugu siunnersuisoqatigiit sulianik akuersissutigineqartussanik suliarinninnerat nakkutilliivigissavaa, tamatumalu saniatigut allanik suliakkerneqarsinnaassalluni.
- Qitornarsiap 18-inik ukioqalereersup qitornarsiarineqarnerata atorunnaarsinneqarnerani ilaqutareqqaakkaminut inatsisitigut attaveqaaqqilernissamut qitornarsiarineqartoq akuerineqarsinnaavoq angajoqqaareqaakkat tamatumunnga akuersippata. Maleruagassat atuuttut malillugit ilaqutareqqaakkanut inatsisitigut attaveqaaqqilernissaaq aatsaat periarfissaavoq qitornarsiarineqartoq 18-it inorlugit ukioqarpat.

Aalajangersakkat immikkut ittut Kalaallit Nunaanni atorineqartussaangitsut

Qitornarsiartaarnermik inatsimmi Danmarkimi atuuttumi aalajangersakkat ataasiakkaat peqqussutissatut missingiummut ilanngunneqanngillat, taakku nunatsinnut naleqqutinngitsutut isigineqarmata. Pingaartumik erseqqissaatigineqarsinnaapput:

- Qitornarsianik nunanit allaneersunik qitornarsiartaarnissamik qinnuteqartut qitornarsiartaarnissamut piareersaataasumik pikkorissartitsinermi pinngitsooratik peqataasusaatitaapput. Piumasaqaat tamanna – pissutissaqavissumik – nunatsinnut tulluurtutut isigineqanngilaq.
- Arnap arnamut allamut meeqqamik naartuussussinissaaq pillugu isumaqatigiissuteqarniartunut Danmarkimi ikorfartuisoqaaqusaasananilu taama ikiorneqartoqaaqusaanngilaq (naartuussussineq). Taamaakkaluartoq arnap naartusup meeqqami paariinnarissaanik kissaateqanngitsup taanna ilaqtaminut, ikinngutiminut nalunngisaminulluunniit meerartaarsinnaanngitsunut neqeroorutigisarmagu nunatsinni takornartaanngilaq.

Kalaallit Nunaanni pissutsit immikkut ittut peqqussutissamut missingiummi eqqumaffigineqarmata Inatsisit Atortinneqarnerannut Ataatsimiititaliap pitsaasutut isigaa. Inatsisit Atortinneqarnerannut Ataatsimiititaliap ”Nunatsinni ilaqutariit inatsisitigut illersugaanerat pillugu naleqqussaannissamut Inatsisartut tunngavissumik tapersersuinissaat pillugu aalajangiiffigissasatut siunnersuut” (UPA 2003/10) pillugu isumaliutissiissutaani ataatsimiititaliaq ima allappoq:

”Kalaallit Nunaanni ilaqutariit inatsisitigut illersugaanerat pillugu maleruagassat ilaqutareeriaatsimut, meeqqat pisariaqartitaannut piginnaatifaaffinullu il.il. tunngatillugit ineriartornermut pisumut pitsaernerusumik naleqquttunngortinneqarsinnaapput. Tamatuma peqatigisaanik ilaqutariit inatsisitigut illersugaaneratigut naalagaaffeqatigiinnermi inatsisit assigiittussaanerat naleqqussaaniikkut iluaqusiivigineqassaaq.

Ataatsimiititaliarli isumaqarpoq ataasiakkaanut tunngasuinnartigut isumagisassaq kingulleq (inatsisit assigiittussaanerannut tunngasoq), kultureqarnikkut aamma qangaaniilli ileqqunut tunngasutigut Kalaallit Nunaanni immikkuullarilluinnartumik immikkoorteqarneq pineqaraangat, illikartinneqarsinnaasoq.

Taamatut immikkuullarissutsit meeravissartaartarnermut tunngatillugu atuulluarsimasimasinnaalluarpot. Taamaammatt ataatsimiititaliamit naalagaaffimmi oqartussaasut kaammattorneqassapput immikkuullarissumut tassunga peqqussutsip atortuulersinneqarnissaanik siunnersuummik suliaqartogalersinnaagu misissorneqassasoq, tassunga tunngatillugu danskit maleruagassaat nunatsinni qangaaniit ileqquusunut naapertuuttuunersut.”

Taamaalilluni Inatsisit Atortinneqarnerannut Ataatsimiititaliap kaammattuutaa malinneqarsimasutut isikkoqarpoq.

Taamaattorli peqqussummi § 5, imm. 2-mi “ilaquttatut qanigisap imaluunniit allatut immikkut ittumik ataqatigiittoqartillugu qitornavissartaartup meeqqallu qitornavissiap akornanni imaluunniit taassuma angajoqqaavisa” akornanni pisut qanoq paasineqarnissaat eqqarsaatigalugu kulturikkut ileqqutigullu immikkut ilisarnaatit aamma sunniuteqarsinnaanerisa eqqumaffigineqarnissaa pisariaqartinneqarsinnaammatt eqqumaffigissallugu tunngavissaqarpoq.

Aammattaq peqqussummi § 2 naapertorlugu ilaquttatut qanigisat allatulluunniit ataqatigiit qitornarsartaarneri pillugit suliani qitornarsartaartunut, assersuutigalugu ukioqassutsimut peqqissutsimullu il.il. atatillugu piunasaqaatinut atatillugu kulturikkut ileqqutigullu immikkut ilisarnaatit aamma sunniuteqarsinnaanerisa mianerinissaat pisariaqassaaq.

Peqqussut tunngavigalugu allaffissornikkut maleruagassanik atuutsitsilernissaq sioqqullugu naalagaaffimmi oqartussaasut Naalakkersuisunut tusarniaaneranun atatillugu tamanna eqqumaffiginiaqqullugu Naalakkersuisut Inatsisit Atortinneqarnerannut Ataatsimiititaliamit kaammattorneqarput.

Qitornarsartaartussanik akuersisarneq pillugu immikkut paasissutissat

Kinaassusersinagit qitornarsartaartarnerit (tassa imaappoq kinaassutsimik paasisaqarnani qitornarsartaarnerit) aammalu qitornassamik qitornarsartaarnerit ilaquttatullu qanigisatut allatulluunniit ataqatigiilluni qitornarsartaarnerit Kalaallit Nunaanni inatsisitigut tunngavigineqartumi ullumikkut atuuttumi immikkoortinneqanngillat.

Taamaalilluni – maleruagassat maanna atuuttut malillugit –qitornarsartaarnerup “*misissuiniikkut qitornarsartaariniakkamut iluaqutissaasinnaasorineqarnera*” qitornarsartaartoqarsinnaaneranut aalajangiisuvoq (tak. Kalaallit Nunaanni inatsimmi atuuttumi § 2). Aalajangersagaq peqqussummi ingerlateqqinneqarpoq.

Peqqussutissatulli siunnersuutikkut kinaassusersinagit qitornarsiartaartarnerit eqqarsaatigalugit qitornarsiartaarnissamut piumasaqaatit sakkortusineqassapput. Taamaalilluni *qinnuteqartoq qitornarsiartaartussatut akuerineqarpat* aatsaat meeqqanik (matumani paasillugu inunnik 18-it inorlugit ukiulinnik) qitornarsiartaarnissaq akuerineqarsinnaassaaq. Taamaattorli katis-simallugu aapparisaq meeraanik imaluunniit qitornarsiaanik (“aapparisaq meeraanik qitornarsiartaarneq”-mik taagorneqartoq) imaluunniit qitornarsiartaartussap aammalu qitornarsianngortussap imaluunniit qitornarsianngortussap angajoqqaavisa akornanni ilaqqatut qaneqati-giittoqartillugu (“ilaqqatutullu qanigisatut allatulluunniit ataqatigiilluni qitornarsiartaarnernik” taagorneqartoq) qitornarsiartaarniaraanni – maleruagassat inatsisit atortinneqarnerannut ministerimit aalajangersarneqartut malillugit – akuerineqarpat piumasaqaataannilaq.

Qitornarsiartaarniartut (kinaassusersinagit qitornarsiartaartarnissamik qinnuteqarnerni) akuerineqartarnerat pillugu maleruagassanik aalajangersaanissamut peqqussummi § 27-ikkut inatsisit atortinneqarnerannut ministeri piginnaatinnearpoq. Inatsisit atortinneqarnerannut ministeriaqarfiup eqikkagaliaani (isumaliutissiissummi ilanngussaq 1) allassimavoq Danmarkimi qitornarsiartaartarnermut nalunaarummi atuuttumi³ maleruagassat assigisaat peqqussut atuutilerpat Kalaallit Nunaannut atuutilissasut.

Inatsisit atortinneqarnerannut ministeriaqarfiup eqikkagaliaani paasissutissiissutigineqarpoq danskit qitornarsiartaartarnermut nalunaarutaat malillugu qitornarsiartaarniartup ukiuinut kii-salu tarnikkut timikkullu peqqissusaanut piumasaqaateqarpoq. Aammattaaq katissimallutik aappariit sivikinnerpaamik ukiut pingajuat avillugu aappariissimanissaat piumasaqaataavoq.

Qitornarsiartaartarnermut nalunaarut Danmarkimi maanna atuuttoq imaattunik piumasaqaataqartoq Inatsisit Atortinneqarnerannut Ataatsimiititaliap ilassutitut paasissutissiissutigisinaavaa:

- qinnuteqartup ukiuisa aallaaviatigut meeqqap ukiui ukiunik 40-nik sinnersimassanngilai.
- Qitornarsiaqarnerup meeqqap sapinngisamik pitsaanerpaamik atugaqarnissaanut periarfissiinera qinnuteqartup timikkut tarnikkullu qanoq issusaata ajorseriaateqartissanngikkaa.
- Meeqqamik perorsaanissamut tunngavissatut naleqquttumik qinnuteqartup najugaqarnissaa.
- qinnuteqartoq aningaasaqarnikkut illersorsinnaasumik atugaqassasoq.
- qinnuteqartup qitornarsiartaarnissamut naleqquttuuneranik nalornissutaalersinnaasumik qinnuteqartoq pillarneqarsimassanngitsoq.

³ Piffissami isumaliutissiissutit matumani pineqartup saqqummiunneqarnerani qitornarsiartaarniartut akuerineqarnerissaat pillugu Nalunaarummi nr. 919-imi, 28. september 2009-meersumi qitornarsiartaarniartut akuerineqarnerat maleruagassiorneqarpoq.

- qinnuteqartut katissimasut piffissami qinnuteqarnermini sivikinnerpaamik ukiut pingajuat avillugu inooqatigiissimassasut.

Qitornarsiartaarniartup ukiorisaanut kiisalu tarnikkut timikkullu peqqissusaanut kiisalu katisimallutik aappariit inooqatigiinnerannut piunasaqaatit taaneqartut Kalaallit Nunaanni qitornarsiartaarniarnermi ullumikkut piunasaqaataasut assigigaat inatsisit atortinneqarnerannut ministeriaqarfiup eqikkagaani paasissutissiissutigineqarpoq.

Eqikkakkami paasissutissiissutigineqartut ima paasineq*assappata* – nunani tamalaani kinaasusersinagit qitornarsiartaarnerit eqqarsaatigalugit – qitornarsiartaarniartunut piunasaqaatit inatsisit Kalaallit Nunaannut atuutsinneqarnikuunngitsut naapertorlugit atuutsinneqartut malillugit nalunaarummi aalajangersarneqartut Naalagaaffiup Sinniisuata atorsimagai, tassunga atatillugu Inatsisit Atortinneqarnerannut Ataatsimiititaliap oqaatigisariaqarpaa taama periuseqarneq tunngaviummik isigalugu eqqarsarnartoqanngitsuunngitsuoq.

Ilaatigut inatsisit allaffissornikkullu maleruagassat Kalaallit Nunaannut immikkut ittumik pingaarutillit nunatsinnut atuutsilinninneranni Namminersornerunermut inatsit naapertorlugu Namminersornerullutik Oqartussat tusarniaaffiginissaannut naalagaaffimmi oqartussaasut pisussaaffeqarsimapput. Maleruagassanik Kalaallit Nunaannut atuutsinneqalinngitsunik atuneq taama pisussaaffimmik avaqqutsinertut isigineqarsinnaavoq.

Ilaatigut qinnuteqartup inatsisitigut illersorneqarnissaa eqqarsaatigalugu maleruagassat malineqartut inatsisinik atuuttunik tunngaveqartariaqarput aammalu maleruagassat malillugit tamanut saqqummiunneqarsimasariaqarlutik.

Kiisalu periuseq nalunaarut Kalaallit Nunaannut atuutinngitsuoq tunngavigalugu sananeqarsimasooq tamanna pissutsit malillugit pisortat ingerlatsineranni inatsisini nalilersuineranut malittarisassiuusseqqusaannginnermik unioqqutitsinerussaaq⁴.

Taamaattorli ajornartorsiutip tamatuma annertunerusumik qulaajarneqarnissaanut Inatsisit Atortinneqarnerannut Ataatsimiititaliaq tunngavissaqarsimanngilaq, tassami tamanna siunnersuummut isumaliutissiissummi matumani pineqartumut toqqaannartuunngikkaluamik attuumassuteqarmat aammalu apeqqutip suliarinissaanut Folketingip Ombudsmandiata matunneqarnissaa ataatsimiititaliamit kissaatigineqanngimmat.

Ataatsimiititaliap isumaqatigiittup siunnersuutip akuersissutigineqarnissaa **inassutigaa**, taamaattorli meeravissartaarneq pillugu inatsisip allanngortinnissaa pillugu inatsisip aamma inatsisit assigiinngitsut allat Kalaallit Nunaannut atuutilersinneqarnissaannut peqqussutissamut missiliummi § 37-p iluarsineqarnissaa pisariaqartinneqartoq Naalagaaffimmi oqartus-

⁴ Tamatumani annertunerusumik annikinnerusumilluunniit nammineq naliliinissamut (Matumanerpiaq pineqartoq eqqarsaatigalugu: Qitornarsiartaariniakkamut qitornarsiartaarneq iluaqutaasussatut isigineqarsinnaanersooq pillugu naliliinissamut) ingerlatsivimmi oqartussaasooq inatsisikkut pisinnaatinneqarpat assersuutigalugu ukiutigut killissarititavavaqqunneqarsinnaanngitsut pillugit ingerlatsivimmi oqartussaasooq pineqartoq taama naliliisqarsinnaannginneranut suliffiup iluani maleruagassanik aalajangersaaqqusaanngilaq. Tunngavissaq tamanna pisortat ingerlatsineranni inatsisini "nalilersuineranut malittarisassiuusisoqqaannginneq"-tut ilisimaneqarpoq.

saasunut nalunaarutigineqassasoq ataatsimiititaliamit kaammattuutigineqarluni, tassami aalajangersakkami pineqartumi taaguut atorineqarunnaartoq "Namminersornerullutik Oqartussat" atorineqarmat.

Taama oqaaseqarluni Inatsisit Atortinneqarnerannut Ataatsimiititaliap siunnersuut aappassaanii-gassanngortippaa.

Harald Bianco,
Formand
Inuit Ataqtigiit

Isak Hammond
Inuit Ataqtigiit

Aleqa Hammond
Siumut

Justus Hansen
Demokraterne